

OM ta bay apelacion den caso di docente acusa di abuso di mucha

Ayera mediante un comunicado di prensa, Ministerio Publico (OM) a informa cu ta bay den apelacion den e caso di un docente, R. de M., kende ta acusa di abusa un alumno y di posesion di pornografia infantil. Den Prome Instancia, hues a declara e sospechoso liber.

Caso

Dia 10 di januari ultimo a tuma lugar e tratamento di e caso contra E. R. de M. E ta acusa di violacion di un menor bao di 12 aña di edad, abuso di su funcion como docente den e periodo escolar 2014-2016, y di posesion di pornografia infantil.

E caso aki ta uno lamentabel no solamente pa e hecho cu ta trata di un caso di violacion di un mucha menor di edad, pero tambe pasobra e sospechoso tabata un meneer di scol na un scol basico na Savaneta y tabata meneer di gym di e alumno, y ademas tabata coach un ekipo di volleyball di mucha homber.

E accionnan lamentabel a sucede tempo cu e mucha homber tabata menos cu 12 aña di edad, y aworaki e victima tin 17 aña di edad. Apenas aña pasa e victima a confesa na su mama tur loke a sucede y asina e mama, hunto cu su yiu, kennan actualmente ta biba na Hulanda, a biaha pa Aruba pa asina pone un denuncia formal contra e sospechoso.

Un di e acusacionnan contra e sospechoso ta posesion di pornografia infantil, potretnan caminda mucha homber, algun di nan su alumnonan di scol y di ekipo di volley, ta sali sin T-shirt, sinta riba scochi di e sospechoso, un sin carson y hasta un video caminda por mira parti di un parti intimo di un hoben tambe.

Na momento cu hues a puntra e sospechoso tocante e potretnan aki, e sospechoso a indica cu e ta un persona cu ta gusta saca potret y como cu e muchanan ta train volleyball, hopi biaha nan sa kita T-shirt door di e calor.

Bayendo especificamente riba e potret di e mucha homber cu a sali cu su carson abou, el a bisa cu net na e momento cu e ta bay saca potret e mucha homber ta esun cu a baha su carson y p'esey e potret a sali asina.

Hues tambe a puntra e sos-



pechoso si e ta haya ta bon pa mishi cu e muchanan of pa laga e muchanan sinta den su scochi/riba rudia, cual e sospechoso a indica cu esey ta simplemente parti di loke ta sucede ora di train of hunga volley.

E acusacion principal ta encera cu e sospechoso a comete actonan sexual y hasta a penetra e mucha homber menor di edad den kleeckamer na scol despues di les di gym.

E sospechoso E.R.d.M. a nega rotundamente tur acusacion den su contra y a declara cu su persona nunca a yega di mishi cu e victima ni cu ningun otro mucha. El a sigura cu e no ta "doe mee" na pornografia infantil y ta sigura cu e potretnan cu a ser haya riba su computer di cas no tin nada di haci cu pornografia infantil y tampoco ta sexualmente estimulante p'e.

Segun mama di e victima a declara den corte, pa motibo di e trauma enorme cu el a pasa e victima ta den tratamiento psicologico y ta evaluando e posibilidad pa intern'e den un facilidad psicologico pa asina por brind'e e miho ayudo posibel.

Teniendo na cuenta diferente aspecto di e caso y investigacion, fiscal di OM a pidi un castigo di seis aña di prizon incondicional, kitando locual e sospechoso a sinta caba den KIA. Ademas el a pidi un prohibicion pa eherce su profesion, cual segun ley por ta maximo cinco aña adicional na e tempo di castigo cu ta ser pidi, cual lo bira 11 aña di prohibicion pa e sospechoso eherce su profesion.

Sentencia

Den su sentencia, hues a indica cu como ta trata un situacion cu ta envolve dos persona so, sin ningun otro victima cu a bin dilanti, Corte mester a primeramente determina si e declaracion di e victima ta consistente, y di dos mester a determina si tin prueba pa respalda e declaracionnan aki. Pa loke ta e prome dos acusacion, esta violacion y penetracion sexual di un menor bou di 12 aña, hues a dicta cu a pesar cu e declaracion di e victima tabata detaya, esaki no tabata preciso ni tampoco consistente. Hues a splica cu tin algun discrepancia den e declaracion di e victima pa loke ta e edad cu e tabatin ora cu e sospechoso a supuestamente comete e acto castigabel, den e klas cu e tabata y tambe si tabata tuma luga

cambio di paña y caminda esaki tabata tuma luga.

Loke no tabata cuadra ta cu e victima a indica na prome instante cu e docente a comete e hechonan castigabel ora e tabata den tweede of derde klas ora e ta cambia paña den kleeckamer. Segun declaracion di e sospechoso, cu Corte a indica a ser confirma cu e scol tambe, den e klasnan ey e muchanan no ta cambia paña.

Despues e victima a indica cu e sospechoso lo a comete e acto castigabel ora e tabata den vierde klas na momento cu e ta cambia paña despues di les di gym den kleeckamer. Corte a indica cu basa riba declaracion di e sospechoso, cual tambe a ser confirma pa e scol, prome cu aña 2020 no tabatin dicho kleeckamer cu e victima ta referi na dje.

Pa e motibonan aki, entre otro, corte a constata cu e declaracion di e victima no ta preciso ni consistente.

Mirando cu e prome pregunta, si e declaracion ta consistente, no por a ser contesta, no a ni pasa na e di dos pregunta cu ta encera si tin suficiente prueba pa respalda dicho declaracion.

E sospechoso E.R.d.M. tabata ser acusa tambe di posesion di pornografia infantil. E acusacion aki a bin despues cu Ministerio Publico (OM) den su investigacion a confisca un computer di e sospechoso den cual a haya un cantidad di potret cu tabata muestra hobennan sin T-shirt entre otro, algun cu tabata muestra parti intimo y videonan cu contenido posiblemente sexual.

Hues a splica cu en total nan tabata 17 potret y dos video cu contenido posiblemente sexual. Despues di a mira e potret y videonan aki, corte ta constata cu mayoria di e potretnan aki ta selfies caminda ta mira e hobennan sin T-shirt, pero di nan torso bay ariba, pues no ta considera cu esaki ta contenido sexual.

Den e caso di videonan caminda por mira e parti intimo di e persona, hues a indica cu como no tin e fecha specifico cu e video a ser graba, no por determina si e persona cu ta aparece den e video ta un menor di menos di 18 aña. Pa e motibo aki hues a declara e sospechoso liber di e acusacion di posesion di pornografia infantil tambe.

E sentencia aki a cay como un shock y sorpresa grandi pa e mayornan y famia di e victima, ken ta na Hulanda bou di tratamento psicologico pa motibo di e trauma cu el a desaroya.

Apelacion

Despues cu riba 31 di januari 2025 Hues den Prome Instancia a declara e sospechoso R. de M. liber di violacion di un alumno menor di edad, ademas di posesion di porno infantil, Ministerio Publico a studia e sentencia di Huez y no ta de acuerdo cu esaki. Ta

